

郵政局特准掛號認爲新聞紙類

中華民國五年八月二十號

湖南政報處發行長沙小吳門吟章代印

湖南政報

△本報價目

一 本報按照陽曆每日出報一本

一 外埠每份月加郵費大洋二角

夫役送報如有遺漏請函告以便查究

一 每份每月收回大洋六角

現因紙價昂貴不敷開支每份每月暫加二角

一 零售每本銅元四枚

暫加一枚

00

49

△目錄

大總統電令

策令

呈

湖南督軍呈報奉到

策令及特任狀日

期請鑒核由

指令

湖南兼代省長令

清鄉督辦林軍事廳彭取消從前三

千人之議各支隊長及所部兵隊統限三

個月銷差遣散由

湖南兼代省長令民政廳轉飭衡山縣縣立

中學校應遵照部令學期試驗時程度不

及者從嚴甄別由

訓令

湖南兼代省長令官書報局局長裁減冗員

并聘委賢能担任湖南通志採訪處職務

由

委任令

湖南兼代省長令委王猷兼充貧民工藝廠

坐辦由

飭

湖南督軍兼省長飭高等檢察廳攸縣知事

詳報舊監及籌設工場擬俟器具購足即

詳

行擇期開工等情一案仰查核飭遵由

湖南民政廳長詳覆新寧縣公民朱鳴盛

等稟請改委知事一案由

批示

湖南財政廳長批科長劉師陶不收受鹽

票例規銀兩由

附錄

湖南督軍兼省長祭烈士文

大總統電令

策令

國務院存記之陳世華李書勳著發山東韓聯奎著發往江蘇由各該省長酌量任用此令
陸軍總長段祺瑞呈准步兵統領江朝宗咨請以趙源補巡捕中營參將于清補北營參將呂得祥補右營遊擊王灝補北營遊擊應照准此令

參謀總長王士珍呈請任命張秀楷署陸軍騎兵第四旅二等參謀官應照准此令

陸軍總長段祺瑞呈請將薩佑授爲陸軍步兵中尉應照准此令

陸軍總長段祺瑞呈准署黑龍江督軍畢桂芳咨請以興古善補佐領永吉納補驍騎校應照准此令

陸軍總長段祺瑞呈准署吉林省長郭宗熙咨請以博文富山補驍騎校應照准此令
陸軍總長段祺瑞呈准熱河都統姜桂題咨請以章國義補驍騎校應照准此令

右八月十六日電

呈

湖南督軍呈

呈為恭膺 特任縷忱馳謝恭呈仰祈 鑒核事本年八月九日准陸軍部咨開准銓叙局咨開本年七月十六日奉 大總統策令特任劉人熙暫行代理湖南督軍此令等因奉此相應將持任狀一張咨送查照轉發等因並將特任狀一封到部准此相應咨送查照執收并將收到日期具報備案等因准此竊 人熙 樛櫟衰齡汲虞短綆梓桑多難救切纓冠乃荷 榮施畀之專閫懼駑駘之罔效時切悚惶幸風鶴之漸平上紓 塵念所有奉到 策令及特任狀日期除咨覆陸軍部查照外謹縷忱具呈伏乞

大總統鈞鑒謹 呈

中華民國五年八月十五日



指令

湖南省長公署指令

令 清鄉督辦林
軍事廳 彭

案照本督軍前以湘省軍隊漫無限制非分別編制遣散無以資收束而杜亂源當經委任該員督辦清鄉事宜兼全省守備隊司令在案查原令編制民軍及現在所帶軍隊均照守備隊舊章每營以二百四十名爲額將來收束至多不得過三千人時期以三月爲限本係節節縮辦法惟邇來迭奉中央來電對於收束軍隊事宜不啻三令五申本督軍爲統籌全局起見原有計畫不能不畧事變通昨據該督辦面稱清鄉就四道分爲四區每區派支隊長一人每支隊長帶兵一排惟武陵道區增爲一連督辦本部駐兵四連合計不過八百人等語是該督辦現有兵數本較原定兵數爲少兼查湘省軍事計畫昨經軍事會議議決所有第一第二第三第四各師分防地點業經妥爲指定另文公布在案是各道區域駐紮軍隊本屬不少關於清鄉及解散編制民軍事宜自應責成各該師長督飭所部妥慎辦理該督辦及各該支隊長遇事相爲協助於和衷共濟之中當收事半功倍之效如該督辦及各該支隊長所至地方現無分防軍隊或發見大股土匪兵單不敷防勦儘可就近咨商各師長或鎮守使酌爲撥調以資鎮攝現在所亟宜解決者爲大庸羅劍仇一案本督軍前經面諭陳師長復初派員前往相機妥辦該督辦爲民黨素所欽服之人尙望相助爲理以期早日結束似此辦理該督辦現有兵數當可敷用毋庸再事加增原令收束軍隊至多不得過三千人之議應即取消仍遵照原定期間以三個月爲限至十月二十日以前各該支隊長一律消差同時將所部兵隊遣散歸農似

於裁軍節財兩有裨益湘中當兵燹之後民物凋殘元氣已竭軍隊多一分餉精百姓即增一分擔負杼軸久空潰裂立見該督辦熱忱愛國見義勇爲務望共體時艱身爲表率諒此苦衷藉蘇民困本督軍有厚望焉切切此令

兼代省長劉人熙

湖南省
長之印


中華民國五年八月十三日

湖南省長公署指令

令民政廳廳長吳嘉瑞

案准 教育部咨開爲咨行事准咨陳開案據衡山縣立中學校詳查本學年職教員一覽表及新招戊班插班生一覽表請查核存轉等情到署據此查該縣縣立中學校戊班學生於民國四年九月招考入校曾經檢同一覽表咨准大部飭知在案茲查賣表所列插班各生入學資格除胡安儒一名在省立第三中學校修業一學期其餘各生概係高等小學校畢業或修業一年插入原招戊班功課恐難銜接惟據稱係認真考試入校可否照准除批示外相應檢同原表咨陳查核見覆等因並職教員學生一覽表二冊到部查該校職教員及學生陳衍祗等二十名資格尙合應准備案其曾紀良劉定國二名僅在高等小學修業一年恐程度不及易滋流弊應請轉飭於學期試驗時從嚴甄別以重學業相應咨行貴公署請煩查照飭遵可也此咨等因准此合亟令仰該廳長即便轉令該縣立中學校遵照於學期試驗時從嚴甄別以重學業切切此令

兼代省長劉人熙



中華民國五年八月十八日

 訓令

湖南省長公署訓令

令官書報局局長

照得湖南官書報局經前督湯咨陳 教育部批行設立其宗旨在昌明國粹促進文化用意良善查該局自設立以來所編各種圖書不無成績可稽而冗員糜費亦所不免應責成該局長體察情形酌量裁減至該局附設湖南通志採訪處既經前巡按使飭辦文獻攸關責任重大該局長尤宜聘委賢能竭力進行以收實事求是之效切切此令

兼代省長劉人熙

湖南省
長之印

中華民國五年八月十二日

△委任令

湖南省長公署委任令

令新委貧民工藝廠坐辦兼肥料捐局總辦王猷
案照貧民工藝廠總辦僅攬大綱應添設坐辦一員駐局以圖進步查有現任肥料捐局局長
王猷堪以兼任斯職除分行外合行令委該員即便遵照前赴該廠將一應事宜隨時會同該
總辦認真辦理毋負委任仍將到差日期具報此令

兼代省長劉人熙

湖南省
長之印

中華民國五年八月十五日

○飭


湖南督軍兼省長飭

爲飭行事據攸縣知事黃慶翰詳竊職縣奉前檢察廳飭即修整舊監籌設工場業經知事繪具圖說詳請前檢察廳核示在案查前呈圖式原估價工程約四百元嗣以原圖不能適用奉前檢察廳將圖改正另頒一圖飭令照辦則原圖與改正之圖規模既有不同估價即難照原議規定兼之原有舊監磚瓦木料朽壞不堪一經拆卸多不合用經職召集承辦工程人員核實估價建築工場及修改舊監教誨室各處共需工料洋九百三十五元三角除工程費外所有工藝器具及基本金約需洋數百元二共約需洋一千餘元計職縣禁煙二成罰款項下自四年四月起至本年六月底止共存洋三百七十九元六角七分七釐提撥補充不敷甚鉅查邑中地方又無別項公款可以騰挪除召集紳商籌捐鉅貲實無別法先由知事倡捐洋四百大元復派殷實正紳前赴城鄉各都分途募捐不拘多少均係各戶樂捐共得捐洋一千三百一十四元五角五分九釐連同禁煙罰款共洋一千七百三十二元二角二分四釐旋經紳商公推正紳胡瑞星江宗海二員經理款項雇工承包購置新料經營建築由知事督同科長員紳暨管獄員監修現經歲事配置尙屬合式共用去建築及修改經費洋九百三十五元三角尙存洋七百九十六元九角二分四釐留作工場基金之用此次興工需款雖超出規定之外然規模闕廠煥然一新建修經費妥係實用實支并無浮冒情事理合備文詳請鈞督察核備案再現在工場雖經告竣本欲開辦工作及實施教誨只因湘省大局初定各犯皆有蠢蠢欲動之勢且以看守無多防範不易如本年五月十三日該監犯等不服收封竟敢毀壞監門鋒擁而出奪槍抗拒幸督飭警隊彈壓將謝福堂等四名格斃始獲安全曾經詳報有案是以開

工教誨稍爲延遲者此耳擬俟工師履齊器具購足擇期開工再行詳報除將圖說書據詳請
檢察廳委員驗收等情據此除批據詳已悉仰高等檢察廳核飭遵此繳印發外合行飭仰
該廳即便遵照此飭

督軍兼省長劉人熙

右飭高等檢察廳廳長唐啓虞准此



中華民國五年八月十四日

●詳

湖南民政廳詳

爲詳覆事案奉

鈞署飭開案據新寧縣公民朱鳴盛等稟稱爲迫懇俯順輿情收回成命另

簡賢員事緣前民政廳長吳委任張國威爲敝縣知事民等以張劣跡素著不堪宰民曾以飭

廳收回成命另簡賢員等情具陳督軍府沐批所請各情如果屬實仰民政廳查明秉公核奪

等因自應祇遵乃旬日以來未見取銷之明示適公榮兼省長人民生命得有庇蔭用敢冒昧

再呈竊敝縣地處偏隅人民愚陋自袁賊禍國湯督屠湘以來官吏均係豺狼苛政毒如蛇虎

閭閻蕭條瘡痍滿目今幸天誅元兇共和再造全國生民喁喁望治非得賢明令尹斷難蘇民

困而清政源茲張國威係邵陽無賴訟痞平時遇事生風無惡不作前歲刁伊至戚吳姓誣控

繼母致令其母子構訟連年家產蕩盡伊乃從中漁利此種敗行不但吳姓族間恨入骨髓即

該邑人士莫不切齒唾罵其道德淪喪有如是者張自刁唆吳姓構訟後知爲清議所不容乃

盤踞省垣向人搖尾乞憐挪馬扯皮之事無所不爲即此次得爲新寧知事純以花酒麻雀勾

通敝縣殘害志士之李瑞璉及侵吞公款之李振鐸一面竊用公緘爲之呈請一面運動鄒某

爲之推轂其人格喪失有如是者且張與瑞璉等深相結納璉等以張爲新甯知事即可彌縫

前此謀害志士侵吞公款之罪惡而張亦仗璉等爲護符可以任意剝削遂其狼貪似此同惡

相濟一旦赴任則我邑人民如水益深如火益熱矣用是迫懇俯順輿情收回成命另簡賢員

閣邑幸甚等情據此除批據稟張國威種種之不法行爲是否屬實一面之詞殊難憑信候飭

民政廳查明核辦可也此批掛發外合行飭仰該廳即便遵照此飭等因奉此本廳查此案前

奉 鈞署批據楊純禮等稟請收回委任張國威成命批行下廳飭即查明秉公核辦等因當

經詳覆據張國威詳報起程日期業已在途似未便遽予撤換等情詳覆在案茲奉檄飭前因本廳遵查新委新甯縣知事張國威係該縣士紳推舉稟奉 鈞署發下原函飭令酌委之員當經本廳接見該員考察才具亦尙開展是以詳請委署新甯縣知事在案竊以人才之難自古同慨改革之初政尙共和各屬知事既無須借才異地而地方士紳均甚願懷才請纓於是軍官之薦牘頻來各界之請求紛至既難律以資格惟有從事考察此次所委知事均經詳請鈞核原不能必其皆賢似無所用其成見惟張國威甫經委任起程若據一面之稟即予收回成命雖共和時代究非政體所宜况查核所稟峻訟運動各節既非切己之事又無証據可言難保非挾嫌攻擊以遂其私擬請俟該知事到任後隨時考察如不勝任再行詳請撤換以肅官方該紳民朱鳴盛等所請另委之處暫請毋庸置議所有遵飭議覆緣由是否有當理合詳請 鈞署俯賜察核批示祇遵謹詳

湖南督軍兼省長劉

民政廳廳長吳嘉瑞

湖南民
政廳印

中華民國五年八月十六日

批示

湖南財政廳批 科長劉師陶不收受鹽票例規銀兩由
據摺陳已悉該科長宅心清潔臨財不苟除從前之陋規垂本廳之定例披閱之餘欽佩無既
着照所請辦理以勵廉隅而昭公允並令各科知照此批

附摺陳

敬摺陳者竊照裕泰長租運本廳丙午秋綱鹽票八張除每票照批准租價繳納光洋三千元外又據繳到票銀四百兩比向該號商查詢據云此係向來承租財政廳鹽票例規歸主管科長收用等語接受之餘深為駭詫竊科長與本科各科人員同任本廳職務同支本廳俸薪此種鹽票既係本科主管一出納自係職分所當為茲獨收受此項例規不獨對於各科人員自覺赧顏即問之吾心亦增內疚擬請將此次收到裕泰長例規銀四百兩充作本廳公費並擬請著為定例自後凡租運本廳鹽票者每票除照時價繳納租價外並附繳公費銀五十兩以外不准再有絲毫例規違者與受同罪計本廳春秋綱鹽票共拾柒張歲可收入公費銀捌百伍拾兩正似此化私為公於與者固屬無損於受者亦屬有名實為公私兩得所有擬請將此次收到鹽票例規銀四百兩充作公費並請以後著為定例各緣由是否有當理合摺陳伏乞廳長批示祇遵

財政廳總務科科長劉師陶

● 附 錄

湖南督軍兼省長祭烈士文

維民國五年八月 日主祭官湖南督軍兼省長劉人熙謹以羊一豕一之儀致祭於殉難諸烈士神主前曰嗚呼噫噫日慘竣烏星張天狗國步斯頻人阨陽九當春之初北風甚栗蒼鷹黠鼠踞我城穴惟諸烈士心若蓬飛但恃義胆寧慮然眉滇黔義旅已作前軫是可忍也孰不可忍將嘗鼃膳而手探湯鼎沸爛指又盪其所嗟爾烈士萌於憤排匪躬之故死亦無悔吏有屠伯軍有賊夫殘民以逞竊當其辜亦有市人非始發難夜觸金吾罰踰城且魚網之設鴻則麗之姓名妻子尚不可知嗟爾烈士手無寸鐵投石擊天折其頸脅天道好還稂莠旣蕪人所同讐潛蹤逋逃我承其乏式輯式撫軫念國殤有淚如雨曩日其罪今載其功成敗之數有同不同嗟爾烈士今其瞑目豐祠肝蟹死非不祿列學薦醴鑿詞誌哀靈風神霧習習其來嗚呼尚享